



## YMA Day-ah chhungkaw tinin YMA flag zar tur

**Chanmari West, May 20 :** Chanmari West Branch YMA executive Committee chu Ni 15.5.2012 zanah khan Pu Zonunsanga Executive memberte inah an thukhawm a, YMA Day-ah chuan Chanmari West chhungkaw tinin YMA Flag zar theuh nise tiin a rel a, heng flag tar turte hi section ten lo ngaihtuah tura tih a ni. Branch YMA president Pu T. Ngurkhuma kaihhruai meeting hian kumin YMA Day chu Section hrang hrangten anmahni pualin function neih tum nise, YMA Day zing karah hian Section tin ten faina hnatlang neih nise a ti bawk.

YMA Day-ah hian YMA chu a lo par vul leh theihna turin nasa taka hmalak a, khawi lai hmunah emaw lo thiat mah se, mizote tan pawl tha, chak leh inngahna tlak a nihzia theih ang kawng kawnga tihlan tum a ni a, chuang chuan branch YMA chuan flag hi chhungkaw tiin zar ngei ngei turin a ngen a ni.

Inter Branch YMA tournament Central YMA in a buatsaiha kan branch YMA inbuatsaihna atana hman tura YMA member-te hnena thawh-

lawm khawn a hmuh tawh dan chu hetiang hi a ni a, tanpuina hi pek zel theih reng a ni.

CH Section : Rs 5440/- 101%

K Section : Rs 4920/- 96%

N Section : Rs 3200/- 80 %

T Section : Rs 5900/- 96%

V Section : Rs 5420/- 93%

**TOTAL : Rs 24,880/-**

He Committee-ah hian kuang tur Plyboard lei fel tawh a nih thu report a ni a, hun remchangah kuang duan hnatlang neih nise, kuang duan sa chu Section tinah sem darh tura tih a ni. Thlanmual hnimte chu hlo kahna hmanga kah tura tih a ni bawk.

Veng a lo thianghlim zawk theihna turin veng chung dawrkaite an dawr kawtah bawlhhlawh bawm dah theuh tura beisei an ni.

## Media Workshop hun hmang

Ni 17.5.2012 khan Central YMA leh I&PR Depatrment-te chuan branch YMA chanchinbu enkawltute tan 'Media Workshop' a buatsaih a, I&PR Secretary Pu K. Lalnghinglova IAS chuan hawngin Pu C. Chhuanvawra leh I&PR Dy. Director

Pu Lalsiama Fambawlten paper an present a, palai 140 chuanguin he zirhona hi an hmang a ni. Chanmari West branch YMA atangin News Editor Tv. Jacob Lalrinsanga leh Circulation Manager EVL. Hruaitluanga te an tel a ni.

## Tunkar thawhleah football khel dawn

Ni 22.5.2012 (Thawhlehi) Dar 9.000 ah hian Chanmari West branch YMA Football team leh Tuikual 'N' te Lammualah an inkhel dawn a, heta an chak chuan Ni 23.5.2012 hian an khel zui leh ang. Veng mipui a tam thei ang ber he inkhel en tur hian branch committee chuan memberte a ngen a ni. Chanmari West branch YMA football team-te :- Manager : Pu C. Zonunsanga, Coach : Pu B. Lalneihsanga Armed Veng, Asst Coach : Pu Lalliansanga. Player - te: 1. Zonunthara, 2. Lalrempuia, 3. Lalrinchhana, 4. Robert Zoramthara, 5. Peter Lalchhuankima, 6. C. Lalbiaktluanga, 7. Lalrinzuala, 8. Lalrinsanga, 9. David Vanlalpeka, 10. K. Lalrinsanga, 11. Zosangliana, 12. R. Lalrinngeta, 13. Eric Zomuanpuia, 14. H. Lalnunzira, 15. Racy K. Lalremmawia, 16. C. Laltanpuia, 17. Lalremruata, 18. Vanlalnunpuia, 19. R. Zoramthara, 20. Zion Lalramluaha.

## Branch News

Ni 18.5.2012 khan kan branch basketball team leh Armed Veng team an inkhel a, a vanduai zawkah kan tang. Players-te leh a enkawltute inpeknaah lawmthu sawi a ni.

Central YMA Tournament inbuatsaihna atana pawisa thawhtu YMA member-te chungah lawmthu sawi a ni.

Ni 22.5.2012 (Thawhlehi) Dar 9:00 Am hian AR Lammual-ah kan branch football team leh Tuikual 'N' team ten an inkhel dawn a, kan players te tawiawm turin kan insawm e.

Kan branch YMA football team te practice tur motor a hruaitu Pu HVL Zasanga chungah lawmthu sawi a ni.

Pu VL Thakima Exe member phailama zin chu dam takin alo haw e.

Pu Hmangaihzuale 'V' Section chuan Zawlbuk sakna atan Rs. 1000 a rawn thawh a, lawmthu kan sawi e.

## LUSUN KHAWHAR

Pu Lalthapuaia Kum 40 'N' Section chuan Ni 19.5.2012 khan min boral san a, a kalsan tak a chhungte Chanmari West branch YMA chuan a tuarpui takzet a ni.

## NGENNA

Pu Vanlaltanpuia 'K' Section In bula Taxi MZ-01A 5863 dah reng thin hian mite tan harsatna a siam a, a ranglama dahsawn tura ngen a ni.

## PEM LUT

1. Pu Zarzolianate chhungkua chu Khatla atangin Pu Lalramliana 'T' Section-te Inah.

2. Baby Lallawmawmite unau chu Biate atangin Pu H. Lalthlamuana 'T' Section-te Inah.

3. Chandra Kumar Chakmate chhungkua chu Chawngte atangin Pu Vanlalrova 'T' Section-te Inah.



## TUNKAR CHANGVAWN

"Nangmahah chuan i mite an hlim theih nan, min tiharh leh dawn lawm ni?"

Sam 85:6

## Editorial Board

<b>Editor:</b>	J.Lalnangliana	9862399658
<b>Joint Editor :</b>	Lalchhandama	9862358347
<b>News Editor :</b>	Thangkhuma	9862303135
	R. Lalringgheta	9862358337
	Jacob Lalrinsanga	9612319779
<b>Cir.Manager :</b>	Johny Lalthanpuia	9612359161
	EVL. Hruaitluanga	9862655426
<b>Production Manager :</b>		
	R.Lalmachhuana	9436151817

## Branch Office Bearer

<b>President</b>	T. Ngurkhuma	9436190843
<b>Vice President</b>	R. Lalmachhuana	9436151817
<b>Secretary</b>	RL. Thanhnuna	9436152760
<b>Asst. Secretary</b>	Zairemmawia	9862385654
<b>Treasurer</b>	C. Lalzarliana	9436142049
<b>Fin.Secretary</b>	K. Darthantluanga	9436196071
<b>Adviser-te :</b>	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

### Editorial :

YMA te hial thiattu an lo chhuak ta hi a pawl hle. Pawl sawisel thiang lo leh thiah theih lo chu a ni hauh lova, a kal dik loh chuan sawisel tur leh siamthat tur a ni a; mahse, chutiang lam hawi ni lova, sawichhiat leh thiah duh a, hmalak a ni a, he thilah hi chuan hetiang ang a, ngaihtuahna leh hmala duh pawl hi chu an dik bik chiah lo ni chuan alang.

YMA hi a lian tawh hle a, mizo thalai huapzo pawl a nih avangin lian tur pawh a ni reng a, he pawl a leng lo chu mizo ni lo an ni. He pawl hian a theih ang angin thil tha a ti thin a, a ti zel baw ang. Mizo a awm chhung chu he pawl hi a pawimawh reng dawn a, thiah mai mai thianga ni lo.

YMA hi Kristian Kohhran nau a ni a, a dintute pawh kristian chhulchhuak an ni a, a kal phung pawh kristian dan hnuaiyah a ni. A thupui pawh 'Kristian nundan tha ngaihsan' a ni a, chuang chuan thiltha ti tura ding leh kristian nun dan tha a nung tur a ni a, chu kal phung chu a pelh vaih chuan sawisel a, siamthat angai tihna a ni ang. Chuang pawh ni lo va, kan duh dan anih loh vang ngawt a, sawisel leh thiah hial tum hi thil tih sa loh loh a ni. He pawl hi chuan hnam a thendarh duh lova, ram leh a mi chengte hmasawna tura hmala tur zawk pawl a ni.

### 2012 Thuvawn

*I awmdan tur chu  
LALPA chungah ngat  
la; Amah chu ring la,  
aman a ti vek ang.*

### Article :

## DUAT

- Zova Tochwang

Duat tih hi Mizote hian hmangaihna leh duhsakna lantirna sang berah kan ngai thin a. A dikna chin awm baw mah se, tur (poison) kung lei tha vura tui pek thin a anna chin a awm thei fo thin. Mikhual leh inleng kan lo ngaihsaka kan theih ang tawka ei leh in, mutbu, an khawsak vel dan nuam leh awlsam tur zawnga duat theih erawh a hlui a mawi a, mi puitling leh zahawm kan nih theihna kawng khat pawh a ni ve reng a. Mizote hian khual chhawn leh lo duat vel hi kan neihten a la tlin loh bakah kan la thiam taw lo fo zawk thin chu a nih hi.

Tun tuma sawi kan tum tak zawk erawh chu kan laina hnaivai, kan nupui/pasal, kan tu leh fate *duat* kan tum dan zawk hi a ni a. Kan lengzem hla pakhat pawh, "Run hmun kan len hun chuan ka *duat* viaw vang che." tih te pawh a awm kha. He hla phuatu hi chu a bialnu hi a fel chi a lo ni lo hlauh ang a, an induat sual ang tih ka hlauhawnpui tak zet mai, kan pi puten, 'Hmeichhe vau loh leh vau sam loh chu...' an lo tih kha a la dik tluang zel si a.

Induat hi hmangaihna lantirna sang ber anga kan la ngaih tlat avangin kan fate duhzawng apiang tihsak kan tum a. Naupang te an nih lai atangin tapa an ngen tawh phawt chuan an ha muatna tur te, an pumin a ngeih loh tur te, an hriseinain a tawrh tur leh an hmasawna tikhawlo thei tur pawh ni se, kan hlawhtlintir zel a. Mi inla changkang thenkhatte tih dan thikin, 'Mate/Bawihite,' tiin ka ko duat hliau hliau va, an duhzawng buaipuiin kan phi ruai thin. Duatna hian rilru pangchanna leh nona a thlen thei a, an rilru a pachan loh phah ang tih lam reng kan ngaihtuah ngai lo va. An taksain a mamawh ni si lo, an ei chak apiang leh an awhzawng apiang tihhlawhtlinsak kan tum tlat thin.

An lo leikan deuh hnuah pawh an men peih chen chen mentira an mut duh chen chen mut kan phalsak a, lehkha an zir that peih loh pawn kan phun lungawi ve mai mai thin. Sikula an mamawh taw aia tam pawisa kan paitir a, a lo rei deuh hnu chuan kawng dik lo zawh pah nan an hmang nge nge thin a ni. Naupang, an pi leh pute bula khawsa chu an pangchang duh an ti thin pawh hi an pi leh puten anmahni rila rah, an fate ngei aia an duat zawka an fate tana an phal loh bur thin pawh an phalsak zel thin vang leh an rilru a nem leh duai thin vang a ni fo.

Sap missionary chhungkaw khat, an in atanga Lalnu Elizabeth-i te in lang pha ngat khawpa London khaw lailia khawsa thinte nen inthenawmin kan khawsa tawh a. An naute khuma an mut a tah a tah pawn an thiltih an thulh ngai chuang hauh lo. Tum

khat chu an fanu kum 7 mi vel Mary leh ka farnuten Japan zawngtah kan tih mai, kutphah chen vela sei zawngtah pheh chi mu an lo ei a. Mary haw hnu chuan a nu chu hmanhmawh taka rawn tlanin ka nu hnenah, 'Pi Ngur, Mary-in eng nge a ei, a uih lutuk,' a rawn ti a. Ka nu chuan hlauthawng takin, 'Ka pi, hetiang mu hi an ei a,' tiin zawngtah rah chu a lo entir a. 'Theirah chu a pawl lo, a duh chuan ei rawh se,' a ti a, a haw lehngal ta mai a. Vawi khat pawh Sap nu hnenah chuan ka nu lo zualkovin, 'Ka pi, Mary hi theihai kung sang tak takah a lawn a, a tlak ka hlau lutuk,' a lo ti a. Ani lah chuan, 'A tlak chuan a sim mai ang,' a lo ti sam et a. Chumi atang chuan duat hmachhuan leh a no ngiak ngiak zawngin fate an enkawl ve hauh lo tih a lang Chiang hle a ni.

Fate hmangaiha an hmakhua tur thlirpui thiamte chuan duat tih hi an dah lal ber ngai lo va. An nun tha lo an sim theihna tur a nih phawt chuan tiang chelek pawh an hreh ngai lo. An fate duhzawng ni lovin, ei leh in tha, an hriseina, an silh leh fen, an zirnate leh an rilru leh taksah chelnate an ngai pawimawh ber a. Sap kan tih mai khawthlangho pheh khu chuan an fate tlema an lo leikan hnu pheh chuan mi hrang en takin an en a. Chu chu an hmangaih loh vang ni lovin an fate an lo puitlin theiha an hmakhua anmahnia an sut kuak theih nan a ni. Anniho inenkawl dan ang siar siara inenkawl chu kan dinmun leh khawsak phungin a la pha lovin a la inrem chiah lo mai thei tih hriat erawh a tha..

*Duat* tih hi a titu lam rilru nona rah chhuah a ni a. Kan rilru hlimna leh kan lungawina kan dah lal ber vanga kan tu kan fate duh ang apiang tihpuitlinsak kan tum tlat vang a ni fo thin. Fa duat ngiak ngiak, fate duhzawng leh nuam tihzawng ringawt dah lalsaka enkawl thintute aiin chhel tur leh fel tur zawnga hmangaihna nena enkawltuten fate an chhuah puitling zawk fo thin tih erawh hmuh tur leh hriat tur kan haihchham hauh awm lo ve. Chuvingin, duatna (affection) aiin an hmakhua tana duhsakna dah lal thiam zawk nachang hre tura nu leh pa tinte kan inzir a hun ta hle a ni.

## TAITESENA

- ☞ An Leader hna thila zin chu dam taka a lo haw leh thuai an duh hle.
- ☞ An Section huamchhunga damlote an dam leh thuai an duhsak hle.
- ☞ Chhungtinte in leh a vel vawngfai leh zual turin an duh.
- ☞ Hun remchang hmasa berah meeting koh tum a ni.

## VANAPA

- ☞ Pu Hmangaihzuala c/o Pi Sanglianhang chu an YMA Buk saknan leh Sport-naa hman atan Rs 2000 chu section kaltlangin a rawn thawh, a chungah an lawm hle.
- ☞ Lalrinzuali c/o Pi Rosiami chu an HSSLC-II Div ah a pass a, an lawmpui hle.
- ☞ An Leader Pu VL Thakima, hruaitu Pu Francis Lalrindika (Sena), section member Tv Isaac VL Peka, Tv R. Laltlansanga, Tv Lalhhanhima, NI Helen Irene-i te Arunachal Pradesh (Basar)-a North East Cultural Festival hmang te pawh dam takin an lo thleng leh ta.
- ☞ Ni 12.5.2012 (Inrinni) zingkar khan YMA Chhang te'n Section chhung thenfai hnatlang an nei a, YMA chhang member thawk chhuakte chungah leh rawn kaltirtu nu leh pate chungah lawmthu an sawi.
- ☞ An section hruaitu leh member, Branch YMA tana Football khel turte theihtawp chhuah turin an ngen a, duhsakna an hlan.

## KHUANGCHERA

- ☞ YMA chhang te an pual thil tihna reng rengah thawkchhuak vek thin turin an ngen.
- ☞ Tunkar thawhle zana BP check hnatlang neih tum a ni a, member-te thawkchhuak vek turin an inngen.
- ☞ Tunlai Section huam chunga muanna awm mek chu lawmawm an ti hle. Hetih lai hian hruaitu duty neih thin erawh chu kalpui zel tum a ni.
- ☞ Inluah tur neite'n inluah tu turah fimkhur zual turin leh vengchhung hmai tibal theitu tur in luah tir lo turin an inngen tak meuh a ni.
- ☞ Inter Branch Basketball tournament neih meka Branch Basketball team-ten hnehna an chang zo lo chu paw anti hle, veng tana pasaltha te an chhuangin an kal leh zelna turah duhsakna an hlan. Tunkar thawhle a branch football teamte inkhel chu en theuh turin an inngen a, an chak ngei theih nan duhsakna an hlan.

## NEUVA

- ☞ 2012 YMA Census chu Secretary-in a kawla, a duh tan en theih a ni a, dahluh hmaih kan awm chuan Section hruaitute hnenah in hriattir turin an ngen.
- ☞ Ni 16.5.2012 khan Section Property atan Gas connection neih thar a ni a, hemi neih theihna tur a hma laksaktu Local Memberte chungah lawmthu an sawi.
- ☞ Ni 13.5.2012 tlai khan Sairang Road Motor Servicing Association te nen inkawmhona leh thingpui in hona neih a ni a, vengchhung thatna tur tam tak sawiho a ni.
- ☞ Section huam chhung hmun thenkhatah Local Council ten Street Light an dah chu an lawm hle.
- ☞ An member Pu Lalthapua Sailo an member-in a boral san chu an ui hle a, a chhunte an tawrhpu hle.
- ☞ An hruaitu K. Lalrinsangi'n Bawngkawn a pasal a nei chu an lawmpui hle.
- ☞ Section huam chhung a ualau taka ZU in thinte in tawh lo tura hriattir in ni e.

## CHAWNGBAWLA

- ☞ Ni 12.5.2012 khan YMA chhangte section chhung tifaiin an hnatlang a, hnatlanga thawk chhuak te chungah lawmthu an sawi.
- ☞ Basketball team chak lo chu paw an ti hle a, football-ah chuan an chak chhoh zel an duhsak hle a, tunkar thawhle a inkhel tur pawh en theuh turin an inngen.
- ☞ Inluah tur neite'n inluah turah fimkhur zual turin leh vengchhung hmai tibal theitu tur in luah tir lo turin an inngen.

## MHIP

- ☞ Ni 11.5.2012 (Zirtawp) zingkar khan Sarah Laldhawmi chu Branch MHIP hminga kan a ni.
- ☞ Tailoring Training Centre leh Handloom Training Centre pawh tluang taka kalpui zel a ni a. Handloom Training Centre chuan naupuakpuan tur an bang zo tawh a, a lei duh tur tan lei theih tura buatsaih mek a ni.

## Tarmit tibo

Pu Lalmalsawma (Sena), T section leh Pu Dengthanga, K section in inkarah step-ah naupang tarmit tihbo a ni a, a hmu leh chhar chuan phone No. 9862560994-ah hriattir ni thei se a thil tibotute an lawm hle ang.

**CYMA football inkhel tur in**  
Arsenal tantu ka ni a, kum tam tak cup chawi lova an awm hi a hrehawm ka ti, chutih laiin Liverpool fans rinawm zia an sawi thin a, an fakawm hle. Central YMA in football leh basketball-ah tournament a siam a, veng tam tak an chhuak a, kan veng pawh kan chhuak a, Basketball-ah pheih chuan kan vawikhat khelhnaah kan tla nghal a, a paw khawp mai.

Naktip mai khian football kan khel ve dawn a, dinhmun tha kan chan ngei a duhawm hle. Champion ngai loh lutuk hi chuan chak ber No mawi hi kan chawi ve turah kan ngai lo lutuk thei a, tunah hian hei hi kan siamthat theihna hun remchang tha a ni ngei ang. Kan football player-te hian Liverpool fans anga rinawmin in hnung kan zui che u a, Arsenal tantute ang hian trophy kan thlir rei tawh hle a ni tih in lo hre dawn nia.

Tun tumah pheih hi chuan kum dang ang lo takin Chanmari West branch YMA member zawng zawngten in tan pawisa kan thawh a, chhe taka inchet a thiang lo. Hnam lamah lawmman pathumna aia hniam nih hi kan rilru-ah a awm tawh ngai lo ang hian, inkhelah pawh hian chutiang chu anih theih nan tan i la tlang ang u.

## THIL BO

Ni 11.5.2012 khan Hunthar peng atangin Taxi kan chuannaah bag a chhunga thawmhaw, Jeans leh T. Shirt leh Santosh Trophy Jersey awm theihngihl a ni a. Taxi Driver kha Chanmari 'W' a awm niin kan hria a, ilo dah tha anih chuan khawngaih takin he Phone No. 9206101739-ah hian min rawn hriattir turin ka ngen a che.

## ZOFA

- ☞ North East Folk Dance Festival, Basar, Arunachal Pradesh -a kal Club member mi 15 te chu Ni 17.5.2012 (Ningani) tlai dar 5:00 khan dam takin Aizawl an rawn thleng leh ta.
- ☞ Doordarshan Kendra (Guwahati)-ah Mizo Hnam Lam chi 3-Cheraw, Sarlamkai leh Chawnglaizawn-te record a ni a, ruahmanna siamsaktu Director (DDK) leh a tul anga hmalatu Pu VL Thakima (Troupe Leader) te chungah club chuan lawmthu a sawi.
- ☞ Ni 22.5.2012 (Thawhle) zan atang hian YMA Zawlbuk-ah veng chhung mi (thalai pual) a duh apiang tan Hnam Lam zirna hun siam tum a ni a, helama tui mite chu lo ngaihven turin an inhriattir.
- ☞ AIR-a Folk Song an record-na hlawh Rs 8015/- lak tawh a ni.

YMA AW hi vengchhung chanchin thar hriatna hnar pawimawh tak a ni.